

神異典第七十一卷

釋教部藝文四

謝齊竟陵王示華嚴瓔珞啟

梁沈約

竊以六詩兩散百氏雲興或事止褒刺或義單小辨莫不雕風烟之氣狀流日月之英華明公該元體妙凝神宙表廕法雲於六合揚慧日於九天因果悟其初心菩提證其後業陟無生之遠岸汎正水之安流受三達十號之尊崇建四辨八聲之妙極法身與金剛齊固常住與至理俱存

均聖論

前人

自天地權輿民生攸始遐哉眇邈無得而言焉無得而言因有可言之象至於太虛之空曠無始之杳茫豈惟言象莫窺良以心虛事絕及天地藪爾來宅其中毫端之泛巨海方斯非譬然則有此天地已來猶一念也我之所久莫過軒義而天地之在彼太虛猶軒義之在彼天地齷齪之徒惟謂赫胥爲遠何其瑣瑣爲念之局耶世之有佛莫知其始前佛復佛其道不異法身湛然各有應感感之所召跨大千而咫尺緣苟未應雖踐跡而弗覩娑婆南界是曰閻浮鬱嶺以西經塗密邇緣運未開

自與理隔何以言之夏殷已前書傳簡牘周室受命經典備存象寄狄韃隨方受職重譯入貢總括要荒而八蠻五狄莫不愚鄙文字靡識訓義不通咸納贄王府登樂清廟西國密塗厥路非遠雖葉書橫宇華梵不同而深義妙理于焉自出唐虞三代不容未有事獨西限道未東流豈非區區中國緣應未啟求其會歸尋其旨要盍與四夷之樂同日而語乎非爲姬公所遺蓋由斯法宜隱故也炎昊之世未火未粒肉食皮衣仁惻之事弗萌懷抱非肉非皮死亡立至雖復大聖殷勤思存救免而身命是資理難頓奪實宜導之以漸稍啟其源故燧人火化變腥爲熟腥熟旣變蓋佛教之萌兆也何者變腥爲熟其事漸難積此漸難可以成著迄乎神農復垂汲引嘉穀肇播民用粒食歟腹充虛非肉可飽則全命滅殺於事彌多自此已降矜護日廣春蒐免其懷孕夏苗取其害穀秋獮冬狩所害誠多頓去之難已備前說周孔二聖宗條稍廣見其生不忍其死聞其聲不食其肉草木斬伐有時麋卵不得妄犯漁不竭澤畋不燎原釣而不綱弋不射宿肉食蠶衣皆須耆齒牛羊犬豕無故不殺此則戒有五支又開其一也逮於酣營於酒淫迷乎色詭妄於人攘濫自己外典所禁無待釋教四者犯人人爲含靈之首一者害獸獸爲生品之末上聖開宗宜有次第亦由佛戒殺人爲業最重

也內聖外聖義均理一而蔽理之徒封著外教以爲烹羊豢豕理固宜然惑者又云若如釋氏之書咸有緣報之業則禹湯文武並受剗周公孔子俱入鼎鑊是何迷於見道若斯之篤邪試尋斯証可以有悟矣

答陶華陽

前人

難云釋迦之現近在莊王唐虞夏殷何必已有周公不言恐由未出非關宜隱育王造塔始敬王之世閻浮有四則東國不容都無答曰釋迦出世年月不可得知佛經既無年曆注記此法又未東流何以得知是周莊之時不過以春秋魯莊七年四月辛卯恆星不見爲據三代年既不同不知外國用何曆法何因知魯莊之四月是外國之四月乎若外國用周正邪則四月辛卯長曆推是五日了非八日若用殷正邪周之四月殷之三月用夏正邪周之四月夏之二月都不與佛家四月八日同也若以魯之四月爲證則日月參差不可爲定若不以此爲證則佛生年月無證可尋且釋迦初誕唯空中自明不云星辰不見也瑞相又有日月星辰停住不行又云明星出時墮地行七步初無星辰不現之語與春秋恆星不現意趣乖若育王造塔是敬王之世閻浮有四此道已流東國者敬

主已來至於六國記注繁密曾無一槩育王立塔非敬王之時又分明也以此而推則釋迦之興不容在近周世公旦之情何得未有

難云夫子自以華禮興教何宜乃說夷法故歎中國失禮求之四夷亦良有別意答曰弘教次第前論已詳不復重辨

難云四夷之樂裁出要荒之際投諸

四裔亦密邇危羽之野禹跡所至不及河源越裳白雉尙稱重譯則天竺屬賓久與上國殊絕衰周已後時或有聞故鄒子以爲赤縣於宇內止是九州中之一耳漢初長安乃有浮圖而經像眇昧張騫雖將命大夏甘英遠屆安息猶弗能宣譯風教必其發夢帝庭乃稍興顯此則似時有通礙非關運有起伏也答曰本以西域路近而大法不被此蓋由緣應未發非謂其途爲遠也其路旣近而此法永不東流若非緣應未至何以致此及後東被皆由緣應宜發通礙各有其時前論已盡也

難曰若必以緣應有會則昔之淳厚羣生何辜今之澆薄羣生何幸假使斯法本以救澆者夫爲罪莫過於殺肉食之時殺孰甚焉而方俟火粒甫爲教萌於大慈神力不有所躋乎若杭糧未播殺事難息未審前時過去諸佛復以何法爲教此教之萌起在何佛兼四戒犯人爲報乍輕一殺害獸受報更重首輕末重亦爲未達夫立人之道曰仁與義周孔所云聞聲不食斬伐以時者蓋欲大明仁

鳥獸草木尚曰其然況在乎人而可悖虐非謂內惕寡方意在緣報觀迹或似論情顧乖不審於內外兩聖其事可得是均以不此中參差難用頓悟謹備以諮洗願具啟諸蔽答曰民資肉食而火粒未啟便令不肉教豈得行前論言之已具不復重釋衆生緣果所遭各有期會當昔佛教未被是其惡業盛時後之開法是其善業萌時善惡各有其時何關淳厚之與澆薄五支之戒各有輕重非殺戒偏重四支並輕且五業雖異而互相發起犯人之戒人重故先出犯獸之戒獸輕故後被訓戒之道次第宜然周公孔子漸弘仁惻前論已詳請息重辨若必以釋教乖方域之理外此自一家之學所不敢言

究竟慈悲論

前人

釋氏之教義本慈悲慈悲之要全生爲重恕己因心以身觀物欲使抱識懷知之類愛生忌死之羣各遂厥宜得無遺失而俗迷日久淪惑難變革之一朝則疑怪莫敢設教立方每由漸致又以情嗜所深甘腴爲甚嗜深於情尤難頓革是故開設三淨用伸權道及涅槃後說立言將謝則大明隱惻貽厥將來夫肉食蠶衣爲方未異害命天生事均理一淪溺爛蛾非可忍之痛懸庖登俎豈偏重之

業而去取異情開抑殊典尋波討源良有未達漁人獻鮪肉食同有其緣泉妾登綵蠶衣共頌其分
假手之義未殊通閉之詳莫辨訪理求宗未知所適外典云五畝之宅樹之以桑則五十者可以衣
帛矣鷄豚犬彘勿失其時則七十者可以食肉矣然則四十九年已前所衣宜布矣六十九年已前
所食宜蔬矣輕煖於身事既難遣甘滋於口又非易忘對而爲言非有優劣宜泉麻果菜事等異同
攘寒實腹曾無一異偏通繒纈當有別途請試言之夫聖道隆深非思不洽仁被羣生理無偏漏拯
羸去甚教義斯急繒衣肉食非已則通及晚說大典弘宣妙訓禁肉之旨載現於言黜繒之義斷可
知矣而禁淨之始猶通蠶草蓋是敷說之儀各有次第亦猶闡提二義俱在一經兩說參差各隨教
立若執前迷後則闡提無入善之途禁淨通蠶則舍生無頓免之望難者又以闡提入道聞之後說
蠶草宜禁曾無槩理大聖弘旨義豈徒然夫常住密奧傳譯遐阻泥洹始度咸謂已窮中出河西方
知未盡關中晚說厥義彌暢仰尋條流理非備足又按涅槃初說阿闍世王大迦葉阿難三部徒衆
獨不來至旣而二人並來唯無迦葉迦葉佛大弟子不容不至而經無至文理非備盡昔涅槃未啟
十數年間廬阜名僧已有蔬食者矣豈非乘心闡踐自與理合者哉且一朝裂帛可以終年烹宰待

膳巨時引日然則一歲八蠶已驚其驟終朝未肉盡室驚噓拯危濟苦先其所急敷說次序義實在斯外聖又云一人不耕必有受其饑者故一人躬稼亦有受其飽焉桑野漁川事雖非已炮肉裂繒咸受其分自涅槃東度三肉罷緣服膺至訓操槩彌遠促命有殫長疏靡倦秋禽夏卵比之如浮雲山毛海錯事同於腐鼠而繭衣絨服曾不懷疑此蓋慮窮於文字思迷於弘旨通方深信之客庶有鑒於斯理一悟行迷克反斷蠶肉之因固蔬臬之業然則含生之類幾於免矣

述僧設會論

前人

夫修營法事必有其理今世召請衆僧止設一會當由佛在世時常受人請以此擬像故也而佛昔在世佛與衆僧僧伽藍內本不自營其食具也至時持鉢往福衆生今之僧衆非唯持鉢者少乃有腆恣甘腴廚膳豐豪者今有加請召並不得已而後來以滋腴之口進蔬藪之具延頸感額固不能甘旣非樂受不容設福非若在昔不得自營非資四輩身口無託者也此以求福不其反乎篤而論之其義不爾何者出家之人本資行乞戒律固然無許自立廚帳并畜淨人者也今旣取足寺內行乞事斷或有持鉢到門便呼爲僧徒鄙事下劣旣是衆所鄙恥莫復行乞悠悠後進求理者寡便謂

乞食之業不可復行白淨王子轉輪之貴持鉢行詣以福施者豈不及千載之外凡庸沙門窮命僕
鑒自營口腹者乎今之請僧一會既可髮像行乞行乞受請二事不殊若以今不復行乞又不請召
則行乞求法於此永冥此法既冥則僧非佛種佛種既離則三寶墜於地矣今之爲會者宜追想在
昔四十九年佛率比丘入城乞食威儀舉止動目應心以此求道道其焉適若以此運心則爲會可
矣

述僧中食論

前人

人所以不得道者由於心神昏惑心神所以昏惑由於外物擾之擾之大者其事有三一則勢利榮
名二則妖妍靡曼三則甘旨肥濃榮名雖日用於心要無晷刻之累妖妍靡曼方之已深甘旨肥濃
爲累甚切萬事云云皆三者之枝葉耳聖人知不斷此三事求道無從可得不得不爲之立法使簡
而易從也若直云三事惑本並宜禁絕而此三事是人情所甚惑念慮所難遣雖有禁約之旨事難
卒從譬於方舟濟河豈不欲直至彼岸河流既急曾無直濟之理不得不從流邪靡久而獲至非不
願速事難故也禁此三事宜有其端何則食之於人不可頓息其於情性所累莫甚故推此晚食併

置中前自中之後清虛無事因此無事念慮得簡在始末專在久自習於是束以八支紆以禁戒靡曼之欲無由得前榮名衆累稍隨事遣故云往古諸佛過中不餐此蓋是遣累之筌蹄適道之捷徑而或咸謂止於不食此乃迷於向方不知厥路者也

因緣義

前人

凡含靈之性莫不樂生求生之路參差不一一爾流遷塗徑各異一念之間衆緣互起一因一果內有差忒好生之性萬品斯同自然所稟非由緣立固知樂生非因緣因緣非樂生也雖然復俱宅形骸而各是一物一念既召衆緣衆緣各隨念起善惡二念誠有不同俱資外助事由一揆譬諸非水非土穀芽不生因緣性識其本既異因果不惑雖則必然善惡獨起亦有受礙雖云獨起起便成因內因外緣實由乎此也

懺悔文

前人

弟子沈約稽首上白諸佛衆聖約自今生已前至於無始罪業參差固非詞象所算識昧往緣莫由證舉爰始成童有心慙暗不識慈悲莫辨罪報以爲毛羣紛品事允庖廚無對之緣非惻隱所及晨

劉暮爚旦月隨年嗽腹填虛非斯莫可兼曩昔蒙稚精靈靡達遨戲之間恣行天暴蠢動飛沈罔非
登俎儻相逢值橫加勦撲却數追念種彙實蕃遠憶想間難或詳盡又暑月寢臥蚊蚋嚙膚忿之於
心應之於手歲所殲殞略盈萬計手因怒運命因手傾爲殺之道事無不足迄至於今猶未頓免又
嘗竭水而漁躬事網弋牽驅士卒懽娛賞會若斯等輩衆夥非一黨隸資遊愆胥交互或盜人園實
或偷人芻豢弱性蒙心隨喜讚悅受分吞臧皎然不昧性愛墳典苟得忘廉取非其有卷將二百又
綺語者衆源條繁廣假妄之愆雖免大過微觸細犯亦難備陳又追尋少年血氣方壯習累所纏事
難排豁淇水上宮誠無云幾分桃斷袖亦足稱多此實生死牢寔未易洗拔灌志慘舒性所同稟遷
怒過嗔有時或然厲色嚴聲無日可免又言謔行止曾不尋研觸過斯發動淪無紀終朝紛擾薄暮
不休來果昏頑將由此作前念甫謝後念復興尺波不息寸陰驟往愧悔攢心罔知云厝今於十方
三世諸佛前見在衆僧大衆前誓心剋己追自悔責收遜前愆洗濯今慮校身諸失歸命天尊又尋
七尺所本八微是構折而離之莫知其主雖造業者身身隨念滅而念念相生離續無已往所行惡
造既由心行惡之時其心既染既染之心雖與念滅往之所染卽成後緣若不本諸真諦以空滅有

則染心之累不卒可磨今者興此愧悔磨昔所染所染得除卽空成性其性既空庶罪無所託布髮頂禮幽顯證成此念一成相續不斷日磨歲瑩生生不休迄至道場無復退轉又彼惡加我皆由我昔加人若不滅此重緣則來惡彌遘當今斷絕永息來緣道無不在有來斯應庶達今誠要之咸達

千僧會願文

前人

弟子沈約上白十方諸佛十方諸大聖今見目前衆僧三界非有五陰皆無四倒十纏共相和合一切如電揮萬劫於俄頃丘井易淪終漂沈於苦岸迷塗遼遠弱喪忘歸區區七尺莫知其假耳目之外謂爲空談靡依靡歸不信不受生靈一謝再得無期約所以撫心自慙臨踐非譬者也至聖凝寂無迹可尋緣應所感事惟拯物持鉢安行出彼祇樹不逾停午以福衆生芳塵餘法峨然未改約以往夏遭罹痼疾帝上哀矜深垂愍慮以月次徂暑日在丙寅仰會千僧於其私宅隆茲重施弗知所限既已奉祇洪德又思自罄家財一舉盈千力難私辦稍而後滿事或易充草堂約法師於所住山寺爲營八集其一仰憑上定林寺祐法主今月二十九日第十會集百僧於所創田廬福不虛捐聞之經訓心路皎然又過於此凡有涓毫應證來業無巨無細咸歸聖主仰願十方共明此誓豈足少

古今圖書集成
酬天谷蓋以微寄誠心云爾

爲文惠太子禮佛願疏

前人

維年月朔日皇太子某稽首和南十方諸佛一切賢聖夫至理可祈必憑誠於正覺極妙有感乃歸仰於真如然後取證現前獲驗茲日去歲皇帝暫虧御膳小廢乾行四海震惶百司戰悚諱歷劫多幸夙世善緣忝生王家叨守儲嗣臣子心地倍用焦迫禁門旦啟欣問暨之安寢屏早闢訪僭夫之宰祇樹獨園伏膺下拜伽藍精舍繞足頂禮百神警衛萬福具臻曾不信宿聖躬和愈豈非三寶之弘慈十號之法力旣而天從心欲誠願克果今於崇正殿奉還法會千僧仍留百僧八關行道又度二士同日出家惟願藉此功德奉資皇帝陛下壽與南山共久年將北極俱長道懋農軒德高堯舜上界八萬之劫可期下方七百之祚未擬元良之位長守膝下之懽上嗣之所永保懷袖之愛以茲法田奉中宮皇后殿下福履攸善無思不屆天母之德厚載不能加任姒之盛坤儀寧足匹末及諸王妃主宮掖嬪房未來因緣過去眷屬並同茲辰預此慈善又普爲積苦餓鬼受罪畜生三途八難六道十惡水陸蠢動山薺翾飛濕生化生有想無想皆藉今日悲慈咸造浣濯人天攝受幽顯證明

庶憑眾力共相津濟謹疏

爲文惠太子解講疏

前人

皇太子以建元四年四月十五日集大乘望僧於元圃園安居寶地禁苑皆充供具珍臺綺榭施佛及僧震元音於六宵暢微言於永劫三達宣其妙果十住讚其祥緣踐二氣而業升離九旬而功就暨七月既望乃敬捨寶軀爰及輿冕自纓已降凡九十九物願以此力普被幽明帝室有嵩華之固蒼黔饗仁壽之福若有淪形苦海得隨理悟墜體鞠塗不遠斯復十方三世咸證伊言茲誓或爲無取正覺

爲齊竟陵王發講疏

并頌

前人

大矣哉妙覺之爲妙也無相非色空不可極而立言垂訓以汲引爲方慈波慧水雖可溉而莫知其源者也靈篇寶籍遠探龍藏蓋無得而言焉至於義指天山之表文隱交河之外又非斷籌所能算也逮於祇樹菴園之妙吼四諦一乘之正說重譯而通中土莫不恆沙之一焉而詞源海廣理塗靈奧雖宇流附響萬軫同起分條散葉離文析句未或暨其萬一也竟陵王殿下神超上地道冠生知

樹寶業於冥津凝正解於冲念若夫方等之靈寤甘露之深元莫有不遊其塗而啟其室也祕藏之被東國者靡不畢集皆繕以寶繖文以麗篆凝光瓊笥炫彩瑤牋思欲敷震微言昭感未悟乃以永明元年二月八日置講席於上邸集名僧於帝畿皆深辨真俗洞測名相分微靡滯臨疑若曉同集於邸內之法雲精廬演元音於六宵啟法門於千載濟濟乎寶曠代之盛事也自法王已降暨於聽僧條載如左以記其事焉乃作頌曰十號神寂三達空元迹由聖隱教以慈宣氤氲緒法昭晰遺鑒標聲妙住騰華寶蓮文摛龍藏義溢中天惟王稟照道冠增曜星羅寶幄雪開梵筵思馳春馬理折秋蟬靈場綢彩正水興蓮乘茲上果永導芳緣

爲齊竟陵王解講疏

二首

前人

夫憑形輝化必由委氣之途因方導理必同肖天之質是以表靈寤瑞誕聖王宮駐彩辰緯停華日月故能積慈成聖累妙成空坦照路於道揚拔迷根於苦岸弟子蕭子良滌盟煩襟栖情正業肅萃僧英敬敷慧典密藏奧文雲開雨散今魄首丹達日弦上朔止步凝想空明屬念雖神迹稍緬而遺塵在茲乃飾筵藻殿張帷盛邸潔誠祇事建斯寶集蘭泉波涌芳藹雲廻祕理探微元況悠邈宗條

既舉窮功允就論堂卷座義鼓停音乘此芳緣將升上住十方三世有證無爽
夫妙極衆象湛

思必通理冠羣方有感斯應自鸞音輟唱圓光寢輝委華之相不傳踊地之符已遠行言入道事難
於造次一悟階空効隔於俄頃若非積毫成仞累燭爲明無以方軌慧門維舟法岸弟子是用夕惕
載懷惟日不足者也故敬集名僧演數奧籍震微起滯輪動雲廻月殿含呂魄弦上日甘露既窮輟
言寶座卷文罷席衣屣相趨仰惟先后稟靈娥德叶景軒度道載華嶽化洽汾陰早棄蘭宮夙違椒
掖千乘不追萬鍾靡及終天之慕不續於短年猷報之誠思降於永劫敬捨軀服以充供施藉此幽
通控情妙覺仰願聖靈速登寶位越四天之表記十號之尊惟茲三世咸證於此敢誓丹衷庶符皎
日

爲南郡王捨身疏

前人

弟子蕭王上白諸佛世尊道德僧衆夫色固無象觸必歸空三世若假八微終散雖復迴天震地之
威窮於寂滅齊冠楚組之麗靡救埃壤而嗜慾易繫每疚心術捨施難弘用迷假照弟子樹因曠劫
嚮報茲生託景中璇聯華日彩玉組夙紆蕃磨早建蘭池紫燕之乘擾於外閑黼帳翠帷之飾光於

中寢徒以心源尙滯情路未昭識謝兼忘理慚獨悟不能叶調五氣綏御六神霜暑或愆風露時外
是以敷襟上寔棲誠妙覺敬捨肌膚之外凡百一十八種當令經術夙理府絡時順萬祉雲翔百妖
窮滌望北極而有恆瞻南山而同永又願宸居納祐則天均慶少陽介福儷日承休儲妃闔膺祥之
符皇枝廣惟祺之祚敬飾崇嚴置寶幄仰延息心旁旅清信助茲弘誓證其幽疑庶可以感降禱
和招對靈應元塗匪昧要之無爽

捨身願疏

前人

優婆塞沈君敬白十方三世諸佛本師釋迦如來安養阿彌陀世尊云云一切衆聖今日道俗諸大
賢德夫形非定質衆緣所聚四微不同風火亦異析而離之本非一物燕肝越胆未足爲譬靜念求
我無時可得而積此淪昏生生不已一念儻值曾未移時障習相蕩旋迷厥路橫指空呼名之爲有
豐己傷物日夜靡休蓄身外之財以充其慾攘非己之分用成其侈豈直溫肌啗腹若此而已哉至
於積篋盈藏未嘗登體溢俎充庖既飫斯棄曾不知粟帛所從事非因已悠悠黔首同有其分離多
共寡猶或未均我若有餘物何由足仁者之懷不應若此侵他之財世稱爲盜盜之甚者孰過於斯